

## 《無心論》CBETA 電子版

版本記錄: 1.1

完成日期: 2002/11/04

發行單位: 中華電子佛典協會 (CBETA) cbeta@ccbs.ntu.edu.tw

資料底本: 大正新脩大正藏經 Vol. 85, No. 2831

### No. 2831

#### 無心論一卷

##### 釋菩提達摩製

夫至理無言。要假言而顯理。大道無相為接。龜而見形。今且假立二人共談無心之論矣。弟子問和尚曰。有心無心。答曰。無心。問曰。既云無心。誰能見聞覺知。誰知無心。答曰。還是無心。既見聞覺知。還是無心。能知無心。問曰。既若無心。即合無有見聞覺知。云何得有見聞覺知。答曰。我雖無心。能見能聞能覺能知。問曰。既能見聞覺知。即是有心。那得稱無。答曰。只是見聞覺知。即是無心。何處更離見聞覺知。別有無心。我今恐汝不解。一一為汝解說。令汝得悟真理。假如見終日見。由為無見。見亦無心。聞終日聞。由為無聞。聞亦無心。覺終日覺。由為無覺。覺亦無心。知終日知。由為無知。知亦無心。終日造作。作亦無作。作亦無心。故云見聞覺知。總是無心。問曰。若為能得知是無心。答曰。汝但子細推求看。心作何相貌。其心復可得。是心不是心。為復在內。為復在外。為復在中間。如是三處推求。覓心了不可得。乃至於一切處求覓。亦不可得。當知即是無心。問曰。和尚既云一切處總是無心。即合無有罪福。何故眾生輪迴六聚生死不斷。

答曰。眾生迷妄。於無心中而妄生心。造種種業。妄執為有。足可致使輪迴六趣生死不斷。譬有人於暗中見杌為鬼。見繩為蛇。便生恐怖。眾生妄執亦復如是。於無心中妄執有心。造種種業。而實無不輪迴六趣。如是眾生若遇大善知識。教令坐禪覺悟無心。一切業障盡皆銷滅。生死即斷。譬如暗中日光一照。而暗皆盡。若悟無心。一切罪滅亦復如是。問曰。弟子愚昧。心猶未了。審一切處六根所用者。應。答曰。語種種施為煩惱。菩提生死涅槃。定無心否。答曰。定是無心。只為眾生妄執有心。即有一切煩惱。生死菩提涅槃。若覺無心。即無一切煩惱。生死涅槃。是故如來為有心者說有生死。菩提對煩惱得名。涅槃者對生死得名。此皆對治之法。若無心可得。即煩惱菩提亦不可得。乃至生死涅槃亦不可得。問曰。菩提涅槃既不可得。過去諸佛皆得菩提。此謂可乎。答曰。但以世諦文字之言得。於真諦實無可得。故維摩經云。菩提者不可以身得。不可以心得。又金剛經云。無有少法可得。諸佛如來但以不可得而得。當知有心即一切有。無心一切無。問曰。和尚既云於一切處盡皆無心。木石亦無心。豈不同於木石乎。答曰。而我無心心不同木石。何以故。譬如天鼓。雖復無心。自然出種種妙法。教化眾生。又如如意珠。雖復無心。自然能作種種變現。而我無心亦復如是。雖復無心。善能覺了諸法實相。具真般若三身自在。應用無妨。故寶積經云。以無心意而現行。豈同木石乎。夫無心者即

真心也。真心者即無心也 問曰。今於心中作若為修行 答曰。但於一切事上覺了。無心即是修行。更不別有修行。故知無心即一切。寂滅即無心也 弟子於是忽然大悟。始知心外無物物外無心。舉止動用皆得自在。斷諸疑網更無罣礙。即起作禮。而銘無心乃為頌曰

心神向寂 無色無形 覩之不見  
聽之無聲 似暗非暗 如明不明  
捨之不滅 取之無生  
大即廓周法界 小即毛竭不停  
煩惱混之濁 涅槃澄之不清  
真如本無分別 能辯有情無情  
收之一切不立 散之普遍含靈  
妙神非知所測 正覓絕於修行  
滅則不見其懷 生則不見其成  
大道寂號無相 萬像窈號無名  
如斯運用自在 總是無心之精

和尚又告曰。諸般若中以無心般若而為最上故維摩經云。以無心意無受行。而悉摧伏外道。又法鼓經。若知無心可得。法即不可得。罪福亦不可得。生死涅槃亦不可得。乃至一切盡不可得。不可得亦不可得。乃為頌曰

昔日迷時為有心 爾時悟罷了無心  
雖復無心能照用 照用常寂即如如  
重曰  
無心無照亦無用 無照無用即無為  
此是如來真法界 不同菩薩為辟支  
言無心者即無妄相心也

又問。何名為太上 答曰。太者大也。上者高也。窮高之妙理故云太上也。又太者通泰之位也。三界之天雖有延康之壽福盡。是故終輪迴六趣。未足為太。十住菩薩雖出離生死。而妙理未極。亦未為太。十住修心妄有入無。又無其無有雙遣不妄中道。亦未為太。又忘中道三處都盡。位皆妙覺。菩薩雖遣三處。不能無其所妙。亦未為太。又忘其妙則佛道至極。則無所存。無存思則無思慮。兼妄心智永息。覺照俱盡。寂然無為。此名為太也。太是理極之義。上是無等色。故云太上。即之佛如來之別名也

無心論一卷